

20/09/1998

Halimah tagih tiket ke Sukan Asia

HALIMAH Janis menagih tempat secara automatik ke Sukan Asia di Bangkok, Disember ini, sesudah mencetus sejarah meraih tempat keenam dalam acara pecut 200m di Velodrom Kuala Lumpur, semalam.

Pencapaian gemilang itu dibuktikan dengan hakikat betapa pelumba Johor berusia 22 tahun itu memecahkan rekod Sukan Sea, 12.6s, dalam pusingan pertama, Khamis lalu.

Khamis lalu, Halimah mencatat masa 12.4s. Dia sekali lagi melakukan masa 12.8s dalam suku akhir.

Sebelum ini, pelumba itu sentiasa dikerah untuk berbangga dengan masa 13s dan senario menarik itu hanya tercipta sesudah 18 hari berlatih bersama Alwi Ahmad.

"Kalau boleh, saya nak ke Sukan Asia. Kalau automatik lagi bagus. Kalau saya tak silap, rekod Sukan Asia sekitar 11.6 saat. Pelumba China yang pegang rekod itu.

"Tapi, berdasarkan masa saya sekarang, saya rasa saya boleh lakukan sesuatu yang baik di Bangkok nanti. Mungkin saya boleh buat sekitar 11 saat," katanya.

Dalam perlumbaan penentuan tempat ke-5/8 semalam, Halimah memperagakan daya kekuatan kayuhannya apabila dia yang ketika itu berada di belakang sekali, memecut ke garisan depan.

Namun, dia kalah kira-kira 2 meter kepada pelumba New Zealand, Fiona Ramage, Melanie Szubrycht (England) dan Tracey Van Niekerk (Afrika Selatan).

Pengurus pasukan wanita negara, Kamal Ahmad, pula bersedia menyerahkan laporan meminta Malaysia menyenarai Halimah secara automatik ke Bangkok.

Seorang lagi jaguh pecut negara, Rosman Alwi, turut mencatat keputusan memberangsangkan apabila meraih tempat ke-10, tewas satu roda kepada Chris Hoy dari Scotland.

Dalam perlumbaan itu yang turut disaksikan Perdana Menteri, Datuk Seri Dr Mahathir Mohamad, Rosman turut menampilkan daya pecutan berkualiti menjelang 50m ke garis penamat.

Perlumbaan 200m itu dimenangi jaguh pecut Australia, Darryn Hill, sesudah dua kali menundukkan rakan senegara, Sean Eadie, dalam perlumbaan akhir.

Pelumba Barbados, Barry Forde, yang juga juara Pan-American 1998, melakukan kejutan apabila meraih pingat gangsa sesudah menangkis cabaran lawan dari England, Peter Jacques.

(END)